


江南通志

自卷十六
至卷十七

庫文閣内		
二四六函	三九六九	漢書
二架	六九二冊	號類

庫文閣内		
二九一函	三九六九	漢書
二三架	六九二冊	號類
(六六六)		

内閣文庫		
番號	漢	3969
冊數	692	(66)
函號	291	97



江南通志卷十六




輿地志

山川 六 寧池二府

寧國府

陵陽山在府城內岡巒迴折府志云勢若蜿蜒為一郡
 之鎮北自敬亭陂陀而南第一峯府治據之二峯在府
 治西南別為鼇峯三峯在東北為府治屏蔽宋郭祥正
 詩陵陽三峯壓千里百尺危樓勢相倚危樓即屏蔽也
 相傳府治晉桓彝時郭璞所建林仁肇更創城制襟山
 帶水於形勢為勝區矣上有樓即謝朓北樓李白所稱
 江城如畫者

淺草文庫



江南通志 卷十六 輿地志 山川 一 寧國府

敬亭山在府北十里府志云古名昭亭東臨宛甸二水南俯城闈煙市風帆極目如畫山南有廣教寺舊爲黃蘗禪師道場唐丞相裴休所建今雙幢院後金鷄井是其遺跡又南麓有井二俱裴休所鑿舊經云裴相井在石益院水白味甘特異他井其虎窺泉九曲池諸舊蹟皆廢其東北有盤龍山麒麟山東有甌山峽石山皆敬亭之支阜也

行廊山在府西名勝志云兩峯對峙環抱若廊廡然上有盤石巨人跡府志相傳梁杯渡禪師過此中有白雲池法雲寺下臨大明湖其西北牛頭山又西北爲方山響山在府南二里宛溪之上俯瞰響山潭府志云唐刺

史路應跨潭爲梁建兩亭於東西崖權德輿爲記

雙羊山在府南三里有雙石羊梅聖俞詩風雪雙羊路梅花溪上村卽此稍西爲栢山

玉山在府南十里其上多古木蒼藤有惠昭寺宋尙書梅詢讀書處李含章亦嘗隱此元張明有詩云春風踏馬銀鞍穩夜月騎牛鐵笛閒蓋詠二事也

嶧山在府南三十里盤旋隱秀上有項王廟甚靈異舊志相傳羽起兵時經此又東十里爲勞山有大小二勞大勞有洞可容數十人

曷山在府南三十里按唐書文德元年楊行密攻宣州客袁襲勸其速趨曷山堅壁以需又天復二年行密遣

兵擊宣州刺史田頽破之曷山卽此嘉靖志作蜀山誤
巖臺山在府南五十里舊志云由橫山趨北形勢巉峭
上有平臺下有石洞乳泉郡守羅汝芳有臺端松抱石
巖底埴棲雲之句其北爲花田山

華陽山在府東南八十里名勝志云其山連跨宣涇寧
旌諸邑其西絕頂曰高峯負出雲表山僧依巖構屋覆
以鐵瓦人多雜猿狖以居其南爲密壠嶺又盤嶺稍西
爲金牌嶺二嶺之間僅通一線爲涇旌間道郡南一阨
塞也山之支壠爲大小墨山爲洞山

橫山在華陽山北十里綿亘巖崿其北爲壁田山孔川
山東爲魯山又東爲新田山

稽亭山在府東南六十里祥符經云宣城稽亭山古仙
人嘗居此行人悅其幽曠每稽駐焉故名有仙人巖三
天洞可容百餘人洞有三竅通明流水自內出可灌田
旁有風穴又有暗洞皆深窅奇絕莫可名狀

柏槻山在府東南七十里府志云山之陽卽文脊山也
峯攢千仞谿迴百折與華陽連屬昔山僧以柏皮爲槻
引水入厨因名其最勝者爲飛橋構險凌空跨岫爲梁
名曰引虹其北爲梅村山西爲歛溪山歛溪山之東連
岡迤邐沿河而走遙屬於水東諸山其西北曰查樹嶺
自寧國至涇道此

水東山在府東南七十里大河東南有市有渡與水西

山分峙

折山在府東南山勢旋折故名相傳奚氏女浣紗於此
仙去

麻姑山在府東三十里名勝志云相傳麻姑修煉之所
有仙壇丹竈劍池石棋枰釣魚臺天遊亭諸迹其東有
靈馬山西有碧泉山

雲山在府東北七十里下有金牛洞詳見古蹟祁門陳
履祥講學於此山頂有藏書洞其北曰蔣山下瞰固城
湖是為高淳南境

工山在南陵縣西三十里高數千丈盤踞七十里縣治
之鎮山也宋孝子李經廬墓於山麓其西峯下有龍湫

北有石岡迤邐而東為石湖山水龍山黃連山同山
朗陵山在工山南晉何琦嘗隱此辟穀煉丹山南有丹
井

射的山在南陵縣西寰宇記云山有玉在石壁內取之
者遇風雨而止人望之如射侯因名

水龍山在南陵縣西南六十里有泉出山巔之石巖噴
五尺許濤湧而下田賴以溉即漳水之源也

呂山在南陵縣南六十里有石室其南為石竇有泉湧
出淮水發源於此

格裏山在縣南七十五里從兩小徑入曰大格口小格
口兩山夾行十五里不斷中有腴田深澗人烟相接

籍山在南陵縣城中東北隅由工山蜿蜒百折至此陂
陀聯絡為邑之鎮

神龍山在南陵縣東二十三里山從分界山來逶迤陂
陀卓起一峯如游龍昂首狀故名上有睢陽廟

水西山在涇縣西五里下臨賞溪循溪而入最幽勝舊
建寶勝崇慶白雲三寺浮屠對峙樓閣參差碧水浮烟

咫尺萬狀唐宣宗曾棲此有朝廷若問江南事報道風
光在水西之句風光宣宗小字也晉葛洪劉遺民唐李

白杜牧皆嘗遊憇焉相接者有白雲山下有白雲潭
大寧山在涇縣西三十里唐猷州城在其下今大寧寺
其地也上有伏虎石

藍山涇縣西六十里太白詩云藍岑聳天壁突兀如鯨
額是也相近有郭山望江山望江之西有石隴洪頭山

五城山在涇縣西七十里五峯環列如城郭然
大城山在涇縣西七十五里與青陽縣接界下有潮泉

相傳郭璞所鑿以應江湖歲旱禱之潮應則雨否則旱
又五里有碧山唐李白棲此

寶峯山在涇縣西八十里府志云石巖高數十尋有人
物鳥獸之狀若雕繪者山背有竇窅然出竇而升則平

遠空曠其下有瀑布飛流千尺鏗訇趾下其對峙者曰
銅峯山

石碧山在涇縣西北石壁四合如屋太白詩石碧望松



寮宛然在碧霄

魚磽山在涇縣西北七十五里府志云山下有泉曰湧泉或云潛通江海嘗有魚隨泉而上者

仙洞山在涇縣西北八十里俗名和尚山山頂有二洞甚深洞口僅三尺餘罄折可入內有煉丹臺藥丸嘗滿見者隨取隨盈樵夫深入時聞絲竹奕棊聲

幙山在涇縣北五里舊志云隋左難當與輔公祏拒戰於此軍幙四周因名故壘尙存北爲桑坑山東爲漢山桐山

琴高山在涇縣東北二十里名勝志云山半有隱雨巖又有洞傳爲晉處士琴高隱此而名其隔溪對峙者有

巖礮洞山中有複洞不柱而屋巷闔幽奇

崑山在涇縣東北三十里其頂有池冬夏不竭旁有朝陽洞遙峯嶺

金壺山在涇縣東二十五里石壁峭拔五十丈有平臺北衝山在涇縣東三十里兩山相並環以清溪相近有巧坑山多怪石幕溪出此又東十里曰慈坑山坑口有觀音洞烏溪出此

眉山在涇縣東六十里下有眉臺眉池相近爲貂蟬山百湖山在涇縣東六十五里與徽之箬嶺相接形如舞袖溪流遶之百折而出

黃幕山在涇縣東南十里高百餘丈與縣治對旁挾兩

山左曰屏黃山亦名桂嶺其形似樓臺右曰寨山形似屏皆山之分脈以爲縣基

硃砂山在涇縣東南五十里名勝志云巉巖險峻俯瞰長流有石赤如日故一名丹山相傳石艷發則有災異先是絕壁不通宋尙書郭燮鑿道跨一橋以濟

黃峴山在涇縣東南六十里高五百丈羣巒列嶂狀若蓮花爲縣治之祖丹溪之水出焉旁有嶺曰百花尖又有筆尖山其南曰湧溪山產茶

承流山在涇縣南四十里九峯羅列與縣治相拱揖峯巒聳秀甲於一邑宋許國公吳潛讀書於此又有許竇二真人遺跡

黃象山在涇縣南九十里碎石五色返照有光舊有寶光菴昔人詩云猿抱子歸青嶂外鳥啣花落碧巖前

駐蹕山在寧國縣南一里府志云明太祖嘗駐蹕於此故名又南四里曰雞山一名鳳山峯巒秀拔爲邑之鎮陽濠山在寧國縣南三十里最高爲邑南嶂絕頂有龍湫噴湧而出遙望如練相近有琴山又南二十里有屏山

丫髻山在寧國縣南八十五里舊志云南唐時嘗作烽燧樓其上外有仙燕洞舊時鄉民避兵之所

千頃山在寧國縣南百三十里府志云與浙江昌化縣接界上有池其大千頃其流南入昌化北注寧國

籠叢山在寧國縣西南百五十里其南屬績溪界峻壁崇關為宣歙阨塞官兵常駐此防戍焉又縣西八十里有塵嶺山亦稱險阨與籠叢相埒唐汪華嘗駐兵有藏馬洞卓戈泉

獨山在寧國縣西五里為縣脉來龍東散入平野為縣治

石鼓山在寧國縣西九域志云上有石鼓天雨則鳴

紫山在寧國縣西百里縣志云高數百仞周二百里中有龍池龍井石埕石鼓諸勝

石鏡山在寧國縣西百一十里有龍巖瀑布又有石鏡能照人

文脊山在寧國縣西北三十里府志云高數千丈周三百餘里西接涇旌諸山北為宣城之柏枧峯巒攢秀巖洞盤旋郡雄鎮也寰宇記云一名曷山

山門山在文脊東南峭壁劃然中開儼若城闔府志云晉瞿劭先生隱此中有六洞曰紫雲曰夕陽曰朝陽曰明心曰碧雲曰漣漪洞前有瞿劭樹為先生手植一本三花即桓温命伏滔作贊處

國朝施閏章山門遊記寧郡匝萬山其磔礪而谿衍者往往者莫如山門巖石環百中豁如甕城高廣數丈其西為文脊峯中多平野山為郭廓其前後高下以洞名者曰朝陽曰紫雲曰漣漪曰枇杷曰龍潭相距不一里許朝陽者南向爽塏戶牖三面蓋瞿劭先生披鹿裘坐石室處東百餘步從怪石中側墜下者紫雲也窅深而明時出雲氣自西北穿澗谷深黑可三百步灑灑聞流泉聲

炬而導客南出於山之尻所謂連漪者也左陟山椒右
陷而中虛崖罅有枇杷樹洞以是名其稍遠者為龍潭
大旱不涸龍窟其中嘉靖間土人竭水灌田雷奮龍見
日為晝暝其水東北逕漣漪合流匯於港口其餘如竇
如井多深隘不可入春夏水漲灌輸萬竅衆山怒號若
考鐘鼓始入門曰靈巖寺有古木數十圍人稱瞿劬樹
其新闢而菴者在腹曰鑿鐵在背曰竹影皆隨山架宇
倚石為壁曲榭層樓人蹈空際而所謂鑿鐵者又一小
石門中有獅子峯倚天昂首環顧崇巖萬怪竦疊余少
而聞之將老而遊春日既佳歡興殫洽樂其洞穴之幽
而多軒豁通朗給人遊目類有道而能容者時無瞿劬
先生石室聞然其人遁迹韜光不與人接而桓温造
訪物色使伏滔作贊温故自可哉千百
世下求斯人之車塵馬跡又可得哉

鴉山在寧國縣西北三十里接廣德界寰宇記云山產
茶味與蘄州所產同梅聖俞所謂茶味鴉山佳者也

冷度山在寧國縣東九十里山有五峯東曰桂山西曰
金字南曰青紅北曰周壁東北曰黃封連綿蜿蜒經數

百里

東山在寧國縣東南五十里山南谿峒逼隘至此獨豁
然開朗下有渡曰石口即東谿所經也

關口山在寧國縣東南六十里又名獅象山兩峯錯峙
若門其中徑隘溪深巖坪泉田多油漆紙皮之利坪盡
山高有懸崖隱洞飛瀑龍湫

天目山在寧國縣東南百五十里山本浙西巨鎮邑中
諸山皆其支脈實有藩屏之勢

棲真山在旌德縣西五里神仙傳云昔竇子明為陵陽
令三年避劉聰亂棄官尋山採藥結廬於此後仙去

正山在旌德縣西三十里峭峻特出諺云正山峩峩接

星斗分列岡巒九十九上有仙人臺響石亭玉井東有郭公巖巖傍刻珍珠泉三字南唐將方道項洪銳嘗屯兵於此相近者有柵山其南有大幕小幕二山

石柱山在旌德縣西六十里雙石挺立高數丈有巨石承之上有豹子尖梁程靈洗討侯景立幟於此築軟血臺又嘗抽矢射山石摧一角因名其石曰射的山

天井山在旌德縣西北三十里山有兩竇飛泉出焉俗呼牛鼻水下有龍潭

石壁山在旌德縣北二十五里兩崖對峙一水中流最稱阨塞舊路躡懸崖上行旅恐慄胡安定周竹坡嘗作歌紀其艱險明嘉靖間通判李默緣溪鑿石成徑始爲

通塗

龍首山在旌德縣北四十里西北有龍潭徽水經其下與涇邑接境

鳧山在旌德縣東名勝志云相傳竇子明旣仙去其二女亦化爲青鳧上昇故名其陽有玉壺山山阿有龍潭梓山在旌德縣東南二里近俯城闡遠凌岫壑爲一邑雄覽旁有奇石石上有桃樹不花而實

蛟山在旌德縣西南五十里山形蟠虬若騰蛟然後有洞徑險難入其中平曠可居又西十里有九峯山

黃山在太平縣南三十里當徽寧二郡界高數千仞盤亘三百里圖經稱爲軒轅棲真之所上有古木靈藥流

江南通志 卷十六
泉香美能已百病按舊志云山有三十六峯屬太平者
八曰翠微曰天都曰望仙曰九龍曰聖泉曰叠嶂曰仙
人曰芙蓉餘詳徽州府

陵陽山在太平縣西六十里西屬石埭北界涇邑一名
三台山有竇子明遺跡下有三門六刺灘李白渡此有
詩其南爲真金山東爲密崖山

仙都山在太平縣西六十里一名遊山府志云舊傳左
難當因唐推功不及居此

龍門山在太平縣西北四十里巖壁峭拔中有石竇如
門產茶及諸藥草

尚書山在太平縣西南二十里相傳隋末有尚書胡裕

居此

通靈峯在寧國縣北二十五里四山環抱獨缺其北巖
頂有龍湫有石巉然曰鷄冠石

黃高峯在旌德縣西南四十里兩峯對峙獨秀雲表有
登仙橋獅子巖硃砂石壁相傳有黃高公者隱此

桓公嶺在涇縣東烏溪嶺東茹麻嶺北道通旌太稱險
阨卽晉內史桓彝戰死處壘塹尙存

楓樹嶺在寧國縣塵嶺北二十里府志云與獨蛇伏嶺
分水叢山四關皆茂密險隘之地明嘉靖中建哨臺其
上又北曰雲門山蟠龍山

千秋嶺在寧國縣東百五十里府志云岡巒纒屬谿谷

陰深路通浙江於潛楊吳招討使李濤攻吳越取道於此宋南渡後嘗列關防戍唐羅隱送梅處士有回望千秋嶺上雲之句土人以雲氣占晴雨極驗

大嶺在旌德縣西旌諸嶺之最高者

春嶺在旌德縣北三十里自鳧山華容峯橫亘二十里南障縣治北界涇邑土人謠爲蠢嶺

南長嶺在旌德縣南一里爲徽寧二郡孔道

箬嶺在旌德縣西南八十里高五百仞跨旌太之間爲新安問道南隸歙縣

鐵甲嶺在太平縣西二十三里峭壁下臨大河中一綫通往來行者足耳

三門嶺在太平縣北十里三方阻絕中通一徑縣治據其陽

青弋江在府西六十里發源黃山會石埭太平旌德諸水下流漸廣遂爲通津北至蕪湖入江

九曲河在府城東源出嶧山受陸家潭水西北流入宛溪

三汊河在府治東宛甸二溪至此合流東岸爲新城西岸爲館驛李白有題宛溪館詩

灣汊河在府治北有渡有鎮今爲鹽埠北出楊青口合黃池流入於江

蒲橋河在南陵縣東二十里上自麻園河來下流蘆港

口與西河水合中有都堂壩雙澗虎狼澗

麻川在太平縣東南三里源出黃山之麓由湯泉至麻陂潭又名白虎潭受旌德諸水逕縣治東門會富溪梅溪西北下焦灘至麻口逕舒溪蟠石赤溪諸水延袤八十里出小河入於涇

南湖在府東北四十里南曰南埭北曰北埭總稱南湖周廣四十餘里其東北有綏溪一名白沙溪納廣德建平之水入於南湖郡治以東諸川流俱歸焉其水西出渾水港達於大河有塞口稻堆二山對峙

宛溪在府城東源出新田山納諸水而來委蛇數十里故曰宛溪上下兩橋上曰鳳凰下曰濟川並跨溪上唐李白詩雨水夾明鏡雙橋落彩虹雨水謂宛句二溪也句溪在府東三里溪流迴曲形如句字源出寧邑籠叢山北流爲水東水西爲後潭又受華陽諸水又西爲陸家爲東溪至此始名句溪李白詩洗心句溪月謂其清也

華陽溪在府東南七十里源出華陽山隨境著名東北流爲魯溪入河

青溪在府南一里相傳寶子明釣白龍處李白有詩龍溪在府北七十里水陽鎮東西兩岸宋紹定中建浮橋今廢爲渡有水兌倉有義倉東岸水碧橋與高淳接界

慈溪在府東北合高淳水至此入河由牛兒港東通五堰往東壩者由此

賞溪在涇縣西南一里涇水流至縣西爲賞溪北入於青弋江賞溪之西有所謂新河者宋崇慶中縣尉劉誼所開以溪流東徙爲民田害欲挽之使西也而卒無成效又縣東有烏溪縣南有楓村溪俱合於此

麻溪在涇縣西南百里卽太平之麻口下流也山環水會舟行勝境唐杜荀鶴詩麻溪清徹底是也距溪三里有澁灘下卽九里潭又下爲羅浮潭

琴溪在涇縣東北二十里源自寧國界歷石門至琴高山過嵩巖寺與賞溪合世傳琴高釣魚於此今三月三日出小魚寸許名琴魚又名藥楂魚蓋琴高丹萍所化也

藤溪在涇縣東南八十里桐嶺之南源出徽嶺過旌德三溪至縣界納諸溪澗之水北入礮潭與賞溪合縣境東南之水此爲最大

東溪在寧國縣東五里源出天目山北流過落花溪又受孔關千秋嶺湯公山陳村博里溪塘千頃山洋丁源諸水是名杭水又北爲東溪至五河渡與西溪合流入於宛溪

西溪在寧國縣西五里卽西津渡源出績溪籠叢山北流逕叢山關過橫溪謂之徽水西南諸水多入焉北受

滑渡環川葛村龍潭諸水縣西川流盡匯於此是爲西溪又北與東溪合

鳧溪在旌德縣東北受鳧山西南之流入於徽水又有楊村溪受鳧山以北春嶺以南之水與大河合

梅溪在旌德縣十一都大嶺以東剝嶺水俱會於黃沙澗入寧國縣又有雪溪在十都亦東入寧邑

舒溪在太平縣西六十里源出歙縣逕石埭東北至涇陽受溲灤二溪水東北合麻川入涇縣界爲賞溪上源水淨沙平焦竝所云十里無波也

三港在南陵縣出西南諸山而襟帶於縣城中者爲中港出工山朗陵之陽流於縣西者爲西港合白石灘諸

水而繞於縣後者爲後港皆合於漳淮下流

橫澗橋水在府南十里源出橫山之麓北逕巖臺又歷花田西山桐子岡會於此橋入宛溪宋郡守張果抱民籍入水死處

淮水在南陵縣源自呂山湧珠泉與漳水合流其下流又有小淮水之稱

漳水在南陵縣源自縣南水龍洞流至澄清河與淮水合寒流曲折清澈可愛

涇水在涇縣南合舒溪麻溪徽水三大水源出石埭太平旌德至邑治合流而北環抱城外縣以此得名

徽水在旌德縣北源出績溪徽嶺之陰北流受清潭水

至縣東北霞溪東溪入焉又西北流與抱麟溪玉溪合是為三溪豐溪水亦入焉北至龍首山入於涇黃池在府北百二十里一名玉溪會郡治東南之水以出大江南屬宛陵北隸姑孰

響潭在府治響山下潭水泓澄丹崖下瞰舟行與山谷聲響相答

敬亭潭在府治盤龍山下泓深莫測歲旱於此挹水以雩

奎潭在南陵縣東北六十五里凡九十九曲中饒菱芡水族

桃花潭在涇縣西南九域志云唐李白與汪倫萬鉅遊


於此潭上有釣隱臺彩虹岡壘玉墩皆當時遊咏之所李別汪倫詩所謂桃花流水深千尺即此潭也

落星潭在涇縣西五十里藍山下相傳晉時漁者見星隕潭中故名

巖潭在涇縣南十里受石埭旌太諸水合賞藤二溪翠壁澄淵山水清妙

衆尋潭在寧國縣西三十里潭際石阜壁立下有龍湫深不可測夾岸桃花十數里俗稱桃源

染浦在南陵縣東北四十里一名白家湖廣千餘畝中多芙蓉菱芡之屬吳赤烏元年建浮城梵刹於中風景為勝



南香澗在涇縣東五十里源出黃沙嶺西會羅溪水歷茶溪會周公坑後村諸水合於烏溪

池州府

齊山在府南三里有峯十餘其高齊等故名或因唐刺史齊映有善政名之按唐書映未刺池其弟照池州刺史訛照為映理或然也舊志云山分三面巖洞三十有二嶺塢泉石亭臺不可勝舉為名勝之區

附明劉岐齊

山記近名山而遊者陟之賦之觴之止矣葺一居設一闕者乎李太白秋浦歌秋浦千重嶺水車嶺最奇或以水車當陽春似矣郭功甫之詩又曰萬丈水車嶺夫陽春未可云萬丈也然牧之南亭詩曰二嶺桃花紅錦黥則不獨一陽春嶺矣以太白久於秋浦遊江祖遊白筍遊桃波遊大樓遊鰓湖道必出齊山齊山湖前曰平天坂太白歌已及之未有咫尺翠微而不知眺詠者水車

之為陽春似足信耳楊廷秀詩曰謫仙狂飲顛吟寺小杜倡情醉上樓齊山之經太白豈非確據哉或以蘇子瞻遊清溪而不遊齊山為惑按清溪詞曰望翠微兮古招提非齊山寺而何或以沈啟達謫池州卜居齊山曰雲巢今不知古屋所在以形勝揣之其近書院乎蓋延慶寺在前舍書院無平行地矣孔義甫齊山寺詩曰飛甍仍在最高巔則山椒之有屠蘇可知矣今延慶之址漸入原隰難云最高也又曰太子池塘烟漫漫池郡自昭明而外別無太子故實今齊山之池塘何有乎齊山湖之前有平天湖朱子九日登天湖用杜牧齊山登高分韻人固以為平天但於登字非宜然其句全用杜語又朱子別賦水調歌頭亦然安得謂非齊山乎張敬夫登齊山曰憶行西湖岸亦復多欵豈頗恨人力勝刻畫時見侵誰知醜石面乃亦變孔壬何如榛莽間屹立長森森天然抱幽獨妙質逢賞音此直似齊山勝西湖矣南軒之意感嘆臨安痛心朝士借西湖以寓其刺譏然雕績多而天然少亦武林之實錄乎謂齊山為幽獨亦指其僻處江澨而言埒視西湖欣賞不謬讀詩而不以意逆可乎人言齊山之草不宜芻牧故本朝於池州不設衛所果爾則齊山翠微寨馬軍寨何以稱焉此皆齊志之疑也貴池立州治始於刺史李芄芄刻齊志於有待岩不可考而殘文之傳者無能表章其失一李方

元刺池搜剔齊山之勝池人知有齊映杜牧而不知方
元其失二紫微刺池齊山客也張承吉張喬齊山主人
也和登高韻者不勝數和南亭僧舍韻者未之前聞志
其主人其失三岳忠武駐節廬山往來岳鄂數莅池州
又刻石蒼玉之間而齊山不為特祠其失四政和中張
先生修長生術結廬齊山尸解去而志不載其丹房其
失五張國安詩曰水石嵌空二百巖今名於志者巖僅
十有一其失六蘇元鼎詩曰巖根堆雁塔當日若有浮
圖又曰碑琅黃閣相齊映若有詞章今並未從辨證其
失七楊廷秀詩曰樓臺玉殿雲中見紺宇之盛彷彿可
微今臺榭俱蕪其失八陳鴻斷碣林繹之題名卦著二
刻邈不可得見其失九池口陳應台敬宗黃瀾伯觀讀
書翠微未留唱和其失十山有泉有井不共疏濬之其
失十一此皆齊志之闕也岐生長於茲年踰六十時時
策杖齊山莫敢決其疑亦
莫能縫其缺記以質焉

太樸山在府南二十里俗名太婆山宋周必大謂不典
更今名其山內聯六峯外托九華

萬羅山在府南二十里舊志云與江祖石隔溪相對上

有羅人石李白秋浦歌謂邏人橫鳥道江祖出魚梁是
也


六峯山在府南二十里府志云六峯競秀望之如列屏
然

大樓山在府南四十里李白秋浦歌行上東大樓者指
此

三十六山在府南七十里府志云雲峯六六上插晴空
鳥道而上曰麻塘嶺

七井山在府南八十里與石埭分界上列七峯湧泉七
穴其麓盤廻數十里遙接九華

盧子庫山在府南九十里一名伏龍巖世傳有龍化人



於巖前未全而止又有龍池雩禱常應相近有魁山
白面山在府西南名勝志云雲崖拱北若傅粉下有白
面渡匯於秋浦

南泉山在府西南七十里
南泉山在府西南七十里有泉唐貞元中創寺於山陽
太和元年賜額南泉承恩寺

郎山在府西南七十里下有玉鏡潭水經注云貴池水
出縣南郎山是也相近有姥山一作舞山有宋陶亮砦
址又宋沈攸之大破賊於赭圻賊奔姥山即此

烏石山在府西南七十里與姥山相對唐廣德初宣饒
賊方清陳莊據此刺史李芄討平之

秀山在府西南八十里疊部如屏貴池在其下梁昭明
太子冕服陵在焉宋陸游入蜀記云秀山梁昭明墓拱
木森然也相近曰雙溪山秀峯山

石門山在府城南九十里其上有青尖唐高霽隱居之
地春臺巖高霽所築桃花塢本李白與高同遊處也存
石刻大小十六字

石橋山在府西九十里西峯山之東兩峯相對一石跨
之若梁梁下奔泉泐石從穿山洞而出

魚載山在府西南百五十里山有懸泉從石壁斷崖三
級而下注於潭中上有巨石倚附飛流如鯉魚狀

黃山在府西南百八十里上有三十六垣與歛之黃山
三十六峯相峙其最高者古牛岡可望匡廬

靈山在府西南二百里黃山之支也其巔有田百畝有泉灌之不竭

孝姥山在府東北三十里瀕江有孝姥廟

碧山在府東十里瀕湖蒼崖翠巘倒影沉碧稍南曰石壁山以形如削壁也

渚湖山在府東南四十里絕頂有田淵泉旁出澄泓如練蒹葭魚鷺若渚湖然故田無旱憂

五山在府東南六十里孤峯獨出其下散爲五支聯絡相屬巍巍然實爲羣山之長

青山在青陽縣北五里縣以此得名

靈鶴山在青陽縣西南十里世傳白鶴真人隱此山之

南舊有夏玉翠瀑二亭山半有逍遙臺

九華山在青陽縣西南十里一統志云高數千丈延袤百八十里舊名九子山唐李白陋其名無所據以山有九峯如蓮花易今名南唐齊邱致政後隱此號九峯先生其巖洞峯壑凡九十有九泉石諸勝不可縷悉爲江南名山之最劉禹錫嘗謂太華之外無奇女几荆山之外無秀及登九華而後悔其失言

聖祖仁皇帝南巡時遣使至山賚

御書九華聖境四大字懸化城寺寺東巖有飛來石最奇古其

北連冠幘山層峯巍峩如冠幘狀附唐李白九華山聯

句序

青陽縣南有九子山山高數千丈上有九峯如蓮花按圖史名無所依據太史公南遊畧而不書

不經故老之口復闕名賢之紀雖靈仙往復而賦咏罕聞予乃削其舊號加以九華之日時訪道江漢憩於夏侯迴之堂循簷岸幘坐眺松雲明王守仁九華山賦長循因與二三子聯句傳之將來

江而南下指青陽而幽討啓鴻濛之神秀發九華之天巧非效靈於坤軸孰構奇於大造遷史缺而弗錄豈足跡之所未到白詩鄙夫九子實茲名之所肇余將窮秘密於崔嵬極遐搜而歷考涉五溪而徑入宿無相之窟窈窕訪王生於邃谷掬金沙之清潦凌風雨乎半霄登望江而遠眺步干仞之蒼壁俯龍池於深窅弔謫仙之遺跡躋化城之縹緲飲鉢孟之朝露見蓮花之孤標扣雲門而望天柱列仙舞於晴昊忽雙峯之闔門真人駕陽雲而獨躡翠蓋平臨乎石照綺霞掩映乎天姥二神升於翠微九子隣於積稻炎嶽起於玉甌欄石碑之文藻回澄秋於枕月建少微之星旄履瓶承滴翠之餘瀝展旗立雲外之旌纛下安禪而步道遙覽雙泉於松杪輪西洪而憇黃石懸萬丈之瀨瀨瀨流觴而縈紆遺石船於澗道呼白鶴於雲峯釣嘉魚於龍沼倚臺碧之晚帆謝塵寰之紛擾攀齊雲之巉峭鑑琉璃之浩淼沿東陽而西歷餐九節之蒲草樵人導余以冥探排碧雲之瑤島羣巒翳其軫轉失陰陽之昏曉垂七布之沉沉靈龜隱而復跳履高僧而煉招賢開白日之杲杲試胡茗於

春陽汲垂雲之淵湫凌繡壁而據石屋何文殊螺髻之蟠糾梯星辰而北盼墮遺光於拾寶緇裳迂於黃匏休圓寂之幽悄鳥呼春於叢篁和雲韶之鴛鴦喚起促余之晨興落星河於簷椽護山憂其驚飛怪遊人之太早攬卉木之如濯被晨暉而爭妓靜鏡聲之剝啄幽人劇參蕨於冥杳碧雞噉於青林鵲翻雲而失皓隱搗藥於膠蘿挾提壺餅焦而翔繞鳳凰承孟冠以相遺飲沆瀣之仙醪羞竹實以嬉翔集梧枝之嫋嫋嵐欲雨而霏霏鳴濕濕於薹葶躡三遊而轉青峭拂天香於茫渺席泓潭以濯纓浮桃瀉而揚縞縞淅淅而絡蔭飲猿猱之捷狡睨斧柯而昇大還望會仙於雲表憫子京之故宅欵知微之碧桃倏金光之閃映曉異景於穹劫弄靈珠於赤水舞千尺之潛蛟并花塘而峻極散香林之迴颺撫浮屠之突兀泛五釵之翠濤襲珍芳於絕巘曼金步之搖搖莎羅躑躅芬敷而燦耀幢玉女之妖嬌攀龍鬚於靈寶墮鉢囊之飄飄開仙掌於嶽嵌散清馨之迢迢披白雲而躡崇壽之參錯之僧寮日既夕而山暝挂星辰於密敷宿南臺之明月虎夜嘯而熊咆鹿麋羣遊於左右若將侶幽人之岑寥迥高寒其無寐聞冰壑之洞簫溪女厲晴漉而曝木雜精苓之春苗邀予觴以玉液飲玉粒之瓊瑤盍辭余而遠去颯霞裙之飄飄復中峯而悵望或仙蹤之可招迺下見陽陵之蜿蜒忽有感於子

明之宿要逝余將遺世而獨立採石芝於層霄雖長處於窮僻迺永離乎塵囂彼蒼黎之緝緝固吾生之同胞苟顛連之能濟吾豈靳於一毛矧狂氣之越獫王師局而奔勞吾寧不欲請長纓於關下快吾生之鬱陶顧力微而任重懼覆敗於或遭又出位以圖遠將無謂於鶴鶴嗟有生之迫隘等滅沒於風泡亦富貴其奚為猶榮薜之一朝曠百世而興感蔽雄傑於蓬蒿吾誠不能同草木而腐朽又何避乎羣喙之啾啾已矣乎吾其鞭風霆而騎日月被九霞之翠袍搏鵬翼於溟渤釣三山之巨鰲道崑崙而息駕聽王母之雲璈呼浮邱於子晉招句曲之三茅長遨遊於碧落共太虛而逍遙亂曰蓬壺之藐藐兮列仙之所逃兮九華之矯矯兮吾將於此巢兮匪塵心之足攪兮念鞠育之劬勞兮苟初心之可紹兮願永矢弗撓兮

魚龍山在青陽縣南七十里深谷中有大小魚龍洞水分七流互相貫通多奇勝接石埭界

龍池山在青陽縣東南七里有石池不竭相傳龍居之下巖有二竇出泉日三度曰潮泉可溉田宋令曹機築

方塘構亭於上其嶺有石橋飛泉懸瀑最為奇勝

讀山在青陽縣東二十里有洞如垂鐸石皆青黛色宋

范仲淹讀書於此故名或以為即古長山誤又東二十

五里曰石龍山又東十五里曰峯山大有山皆與九華

競秀

木瓜山在青陽縣東三十里唐刺史杜牧禱雨處有祭

木瓜山神文

五松山在銅陵縣輿地紀勝云舊有松一本五枝蒼鱗

老幹青翠參天因名李白在此題咏甚多前有鐵船山

銅官山在銅陵縣寰宇記云昔產銅有泉源不竭可浸

鐵烹銅唐置銅官場宋置利國監歲久銅乏場監俱廢

麓有惠泉流為惠溪從磬港入江稍西有銅官渚唐書
僖宗文德元年楊行密襲宣州進兵銅官渚即此

葉山在銅陵縣東郡國志云形如卓筆上有蓮花峯靈
竇諸勝葉法善修煉於此故名山陽有阿泉從懸瀑而

下至葉廟伏流地中亦一奇境也葉山之東有獅子峯
百丈峯馬鞍峯而獅峯最奇特有噴珠泉其平脊有宋

所建清涼寺侍郎羅京故宅在焉
石耳山在銅陵縣南舊志云兩峯並峙一石高丈許有

巨人跡名真人峯
天門山在銅陵縣西南四十里高聳雲表有天門泉續

文獻通考云泉流永城隍至荻港入江山下有晉天福
中所建寺宋嘉祐中賜額梵天又西南有五峯山自天

門山逶迤而起五峯峻削如指泉亦澄澈附唐李白天


門山銘梁山博望關扁楚濱夾據洪流實為吳津兩山
錯落如鯨張鱗惟海有若惟川有神牛渚怪物
目為車輪光射島嶼氣凌星辰卷沙揚濤溺馬殺人國
泰呈瑞時訛返珍開則九江納錫閉則五嶽飛塵天險
之地無
德匪親

鵲頭山在銅陵縣北十里與大江之西岸鵲尾渚相對

江中則鵲洲也即春秋時鵲岸六朝置鵲頭戍今俗呼
十里長山有城洑鎮唐書云懿宗咸通六年置鵲頭鎮

即此
杏山在銅陵縣東三十里舊志云晉葛洪種杏燒丹處

山素產土硃土人以為丹礦也麓有花堰泉相近有石



光山夜常有光

城山在銅陵縣東郡邑志俱云四圍石壁峭立惟南一徑可通如城門山頂平坦可數百畝中有一井遇陰晦則雲氣湧出

鳳凰山在銅陵縣東五十餘里世傳有鳳凰集其上石窟有泉珠璣錯落名鳳飲泉宋太宗時賜道士趙自然金山在銅陵縣東南三十里有金牛洞南有鬪牛洞舊傳上有鬪牛遺跡

陵陽山在石埭縣北五里山有三峯其東峯屬太平縣中峯山半有丹臺竇子明得仙處旁有丹竈丹井山麓有黃鶴池白鶴墩黃鶴林皆子明遺跡晉郭璞詩陵陽

宜丹砂指此

金城山在石埭縣西二里宋開福寺在焉山列寺旁宛若城郭又西三里曰萬春山圓墩小阜纍纍如走珠松木蒼鬱

雨臺山在石埭縣西十五里山七十二折望之如蓮汎水舊名蓮花峯頂平如掌五代時西峯禪師卓錫於此建海獅菴一泉隨錫而湧名龍井亦名西峯井泉今禱雨輒應

魚龍山在石埭縣西三十里山最峻聳有二洞大者洞口一池水紺碧色口內奇石各異狀土人云中有綠魚白鳥歲一見之也其小者相去半里許北接青陽界

七井山在石埭縣西七十里其山與貴池接延袤數十里中有七井炎暑亦涼上有望夫尖竹木蒼翳多產藥材

城子山在石埭縣西九十里環繞如城前有紫潭

慈雲山在石埭縣西百三十里有慈雲洞深可三四里石乳凝結有石磬石板擊之錚然有聲

雙塘山亦名桑塘在石埭縣西百五十里有泉淪茗數日不變

杉山在石埭縣西百六十里有待月螺髻等峯最高者曰鐘樓尖有蓬萊第一洞洞口低狹漸入寬廣容數百人

櫟山縣志作歷山寰宇記云石埭縣西百六十里有櫟山高五里與祁門太平接壤其山石壁峭削下有龍池可百畝池右一石高丈許直裂爲二中擎一丸又一石鏡縱橫二丈光明可鑑人物皆奇跡也其並峙者曰峒山具泉石之勝

蘆山在石埭縣南十五里東連鳳凰山南接壤嶺巖深林密隱者多結廬於此其西曰駝山狀如負重

蓋山在石埭縣南三十里屹立河濱望之如蓋隋地理志云涇有蓋山有舒姑泉相傳舒氏女坐泉處仙去按石埭自涇縣析置

五溪山在石埭縣南百二十里上有五溪合流而下

白象山在建德縣治北縣之主山也以形似名旁有蛻龍洞

博陽山在建德縣東十里有滴水巖及鯉魚石蚌珠石佛石

五龍山在建德縣東三十里五峯森立山半有石井名化龍池深不可測

玉峯山在建德縣南半里絕頂有石光瑩如玉宋嚴華摹漢武帝石刻壽字勒於山半名壽字崖

三面山在建德縣南四十里有石笋白如人面者三故名

梅山在建德縣西南十里巖壑頗勝


歷山在東流縣東三十里南望匡廬西瞰江渚最為雄傑上有池二一久雨不盈一久旱不涸下有仙姑井觀者呼仙女則花湧出

延壽山在東流縣東六十里懸崖壁立有泉噴流又東十里曰列疊山

香山在東流縣南四十里疊郭層巒有石巖泉洞之勝相近曰隱山一峯峭絕

水車嶺在府西南六十里峭壁臨淵奔流衝激若桔槔聲唐李白詩所謂秋浦千重嶺水車嶺最奇是也

鹿運嶺在府城東三十里相傳高僧盧公面壁於此鹿為運水故名一名滄鹿嶺



清泉嶺在青陽縣西十里道旁一泉出石罅初名鮑泉
繼名趙泉宋真德秀過此為易名清泉作銘系之 附宋

真德秀清泉銘 芙蓉嵯峨與天相摩氣與天通秀綠浮
河地靈脉潤如江之沱乃吐斯泉於山

之阿行道渴飲孰日弗過淨洗五濁澡雪百病涓涓無
窮廣濟實多餘澤所被芄芄黍禾上善利物其達盈科

名揭而清
萬古不磨

鳳凰嶺在石埭縣西南百二十里嶺下有三溪合流處
有巨石橫亘如埭中一石四方平廣尤覺傑然下有石

竇最深縣所由名也

普門嶺在建德縣西南十五里宋朱子至此書普門嶺

三大字刻於石

西峯巖在府南九十里石臺上有巨人跡南為西峯洞

項有龍池從石壁瀉水伏流地中至劉村口小澗仰噴
而出

紫巖在府西南三十里有泉曰紫泉宋周必大錄云池
陽三十里至紫巖產紙處即此


水簾巖在建德縣東七里俗名夫子巖梅堯臣有水簾

巖詩

石礮磯在銅陵縣北五里瀕大江有三石門水涸可出
入容數十人亦名五霞洞

祝家磯在東流縣北五里橫江激湍舟行甚險昔有祝
姓者施纜於此以濟往來故名

黃石磯在東流縣東北五十里濱大江旁有黃石港多



黃土巨石相綿亘
古仙洞在府南六十里古仙峯下舊志云世傳此洞為
神仙窟宅中有石碁局鉦鼓在焉

白雲洞在青陽縣東二十里洞多怪石秉炬入遊竟日
莫測其底

龍池洞在建德縣東四十五里良禾嶺下石室高敞有
池三懸瀑如疋練下注

迎春洞在建德縣東南七里高深如屋傍有兩石穴可
秉燭入名藏春洞

大江在府北五里上自雁汊東流縣界下自大通鎮抵
荻港入繁昌縣界計一百八十里

李陽河在府西六十里源引大江以江流之消長為盈
縮一名李王河府志云自河口出江有石槎枒橫突為
欄江羅刹二磯南唐周湛擊爰流以避其險謂之新河
後磯勢頗安而支流漸侵齧民田正德中作堤鄣之羅
刹磯在大江中其上有叢篠喬木明黃觀殉節於此
池口河在府西五里即貴池水也唐以此名州古稱貴
口亦稱鱣口宋時始稱池口沈仲玉至貴口不敢進齊
書云沈仲玉自鱣口欲斷江李安民進軍破之胡三省
通鑑注云即今之池州貴池口也其源五一出石埭一
出古源一出考溪一出石嶺一出東源匯於秋浦由杜
塢入池口以達於江



清溪河在府東北九域志云池州貴池縣有清溪鎮其
水源有二一源出西南之洵溪與棠溪峽川之水交於
白洋匯於江祖潭是爲上清溪一源出縣南太樸山注
於白沙河蝦湖東塘湖合三水下流是爲下清溪東北
五里入江
梅根河在府東四十五里源亦有二一出九華由五溪
折流於五埠溝一出太樸山瀉於馬牙橋遶龍潭與五
埠溝之水交於雙河以入於江吳置冶於此謂之梅根
冶宋有鑄錢監故又謂之錢谿按宋書鄧琬傳陳慶至
錢谿不敢越於梅根立砦按此似錢谿梅根雖一地而
略相隔也


大通河在府東北六十里其源七自青陽者四自銅陵
者三俱會於車橋河至大通鎮入江

五溪河在青陽縣西二十里源出九華山一曰溧溪二
曰澗溪三曰雙溪四曰曹溪五曰瀾溪會於六泉口經
五溪橋至梅根河入江

臨城河在青陽縣南自分流嶺經峽山而西會於大通
河

博山河在青陽縣南七十里其源四會於陵陽鎮由琉
璃嶺下入於石埭之舒溪

管埠河在青陽縣東北二十五里其源九會於石堰經
木竹潭與東河諸水合流於大通河



江南通志 卷十六
銅陵河在銅陵縣西北七里其源三會於橫塘隔入市後湖達於江

荻港河在銅陵縣北八十里源出朱村會各鄉之水至北下社入江

饒河在建德縣南九十里一名龍口河其源三匯於昭潭合於饒河迤入饒州之獨山湖西達彭口入於江

香口河在東流縣南六十里源二一出彭澤山林港一出陳蒼原交於三汊繞查池爲香口河入江又縣南一

里有江口河

黃湓湖在府西北九十里湖口通江多魚舊設河泊所大清河在東流縣東北四十餘里澄澈如鑑流至黃湓

入江

蓉溪在青陽縣南五里其源六會於臨城河

舒溪在石埭縣續文獻通考謂之旋溪本陵陽子明垂

釣處後以舒氏三女仙去故名舒溪溪源一出太平縣

之弦歌鄉一出縣之舒泉鄉經城南合余溪嶽溪諸水

下涇縣至蕪湖入江溪中有轆轤石在城南五十步許

其水激石旋轉有聲卽有賢士出

璉溪在石埭縣西南八十里其源二一出大字坑一出

石門坑合鴻陵溪管溪經石埭達貴池之池口

貢溪在石埭縣西南九十里經杉山之麓西流入貴池

之秋浦

曹溪在石埭縣西南百二十里源出鳳凰嶺西流為五溪之一

茹蘭溪在建德縣東南城下其源出迎春朝霞兩洞西流入堯城溪春夏水溢可通舟楫

玉鏡潭在府西南七十里江祖潭下數里許

上下雲潭從九華山翠蓋峯發源飛流激石而下上潭有三汲亭下潭有雪浪亭俱廢中流一石名釣臺其旁瓔珞亭如流蘇也

雪潭在石埭縣西五里石壁山下長廣數畝而深不可測俗傳源通大江


陵陽潭在石埭縣迎賓門外泉源淵深澄碧可挹相傳

竇子明放白龍於此

秋浦在府西南七十里舊唐書云隋置秋浦縣因水為名舊志云長八十餘里闊三十里按今地有石城至池口皆是四時景物宛若瀟湘洞庭

浮桃澗在青陽縣碧桃巖下懸水西南趙知微植桃千株鄉人因以致富

上下華池在青陽縣九華山與雲峯山兩山合而成流上華池即龍池下華池下注逆上激水最奇亦產異茗龍池在九華山絕頂其上為五龍灣每一灣為一池注下為千尺泉龍所宅也旱禱輒應復注下為弄珠潭出伏龍橋北流為五溪之一



嘉魚池在九華山雲峯龍遊澗下池中有石臺乃竇子明李化文垂釣處其水深三四尺峻壁四合上有二水湊爲垂瀑中多異魚

老龍池在石埭縣大宁坑左右夾以峭壁人跡罕至禱雨時架木而上秉燭從石竇入四五里許以縵繫抵池取水水得卽雲雨隨之

東坑泉在府西百里毛嶺北發源僅濫觴流出漸大東注玉鏡潭隨地作堰一十五所

眞珠泉在青陽縣東三十里泉出纍纍如珠

漱玉灘在青陽縣雙石巖東漱石琮琤有戛玉聲宋陳巖有水石相逢驟作聲鏗然律呂自天成之句

白笥陂在府西南二十五里唐處士鞏疇棲隱處

江南通志卷十六終

江南通志卷十七

輿地志

山川

七

太廬鳳三府

太平府

青山在府東南三十里綿亘甚遠府志云晉桓溫與袁

宏遊青山共載而歸卽此齊謝朓築室山南故又名謝

公山峰巒層疊有林壑泉石之勝宋米芾書第一山碑

在麓

尼山在府東南四里一名尼坡山麓舊有古梅數十本

寒香沁人彷彿羅浮鄧尉又名梅山宋鄭羽建百花頭

上亭盧鉞爲之記

九井山在府南十里山有九井今竭其五世傳桓溫所鑿元和志云殷仲文九日從桓元登九井賦詩卽此龍山在府南十里怪石磊砢蜿蜒如龍因名孟嘉九日登高落帽卽其處縣志云輿圖考謂屬江陵龍山非是按溫鎮武昌非江陵也武昌無龍山溫時爲鎮將豈得適千里遊山乎又考陶靖節集孟嘉傳云嘉令巴邱入官從事中郎遷長史在朝隤然正順而已每會神情獨得超然命駕徑之龍山顧影酣宴造夕乃還若江陵龍山距朝三千餘里何能趣命駕而竟夕返乎其爲當塗龍山灼然矣郡志云桓溫嘗以重九日與僚佐登此疑必溫移鎮姑孰時事也

博望山在府西南三十里亦曰東梁山與江西岸和州之梁山對峙如門故亦名天門山卧江中遠望如積黛故又名蛾眉山春秋時楚獲吳餘艘於此宋孝武閱水軍有雙爵集繖蓋因立雙闕於博望

褐山在府西南三十五里臨大江五代用兵處宋史云紹興二年命沿江置烽火臺於當塗之褐山卽此也金柱山在府西三里宣歙諸水由姑孰入江奔瀉於此明萬曆間民掘地得金邑令章嘉貞請於郡守割千金建塔其上以鎮之初名鐵淋壁以西方屬金故名金柱黃山在府西北五里山形如初月傳有浮邱舊跡又名浮邱山上有宋孝武離宮今存凌歊臺遺址許渾詩云

三千歌舞宿層臺是其處也

采石山在府西北二十五里昔人采五色石於此因名一名翠螺山後漢丹陽疆域志云西臨大江為吳楚險要晉王渾駐師取吳隋韓擒虎宵濟破陳宋曹彬渡江取南唐明常遇春先登獲捷皆在此山南有磯峭拔險峻亦曰牛渚舊傳金牛出此故名輿地志云溫嶠平蘇峻亂至牛渚磯以下多怪物燃犀照之奇形異狀畢見南趾有燃犀亭在其上李白騎鯨亦在此故謫仙樓捉月亭皆在焉附梁元帝元圃牛渚磯碑寫以增城九重仙林八樹未有船如駕鶴時度宓妃橋似牽牛能分織女丹鳳為羣紫柱成列清風韻響即代仙歌桂影浮池仍為月浦璧月朝暉金樓啓扉畫船向浦錦纜牽磯花飛拂袖荷香入衣山林朝市併覺忘歸

磨盤山去郡二十里晉書云鎮西將軍謝尚守采石駐兵於此其地即將臺

葛陽山在郡治北四十里上有羊耳洞藤蘿隱蔽洞前方石相傳為葛仙翁棋局東上有八仙臺潘母床相傳潘母亦仙去山勢環抱最為幽勝

鸚鵡山在郡城北與葛陽山相連山有鸚鵡石雌雄各一每遇雷雨鸚鵡子從石中迸出圓潤如卵土人得之用以治疾有石嵌空側出如半帆長丈餘俗呼為船尖峰東壁諸巒環顧拱揖如欲來船者亦一奇也望夫山在府西北四十里山高百丈正對和州城樓九域志云昔人適楚不還妻登此山望之乃化為石

寶積山在府北二十里舊傳山產青綠因名宋孫仙姑跨鶴飛昇於此今丹池及石刻猶存

白壁山在府北二十五里濱江三峰拔起如聖一名石壁俗名龜山李白與崔宗之乘舟月夜自金陵溯流過

此玩月白衣宮錦袍坐舟中旁若無人有秋月照白壁皓若陰山雪之句

慈姥山在府北四十里昔楚僧真定見磯頭浪湧以杖錫開河於磯後水分舟便故又名和尚港山南峭壁臨

江產圓竹聲中音律可為簫管相傳馬融所賦洞簫即此山竹也上有丁蘭祠

赤金山在府東北十五里舊出銅類金淮南子食貨志所謂丹陽銅也今不產


藏雲山一名神武山在府東北二十五里山高且深可藏雲遂名中峰峭立百丈左為致雨峰雲起即雨禱輒

應 翰壁山在府東北四十里梁武帝起居注云大同九年鴻臚表往姑孰翰壁山采石墨即此

橫望山在府東北六十里連亘三邑丹陽湖在其南左傳云楚子重伐吳至衡山即此按衡與橫通杜預注謂

四望皆橫因名橫望陶弘景嘗隱此構讀書堂下為澄心寺關公廟廟前峭壁參天老松倒垂長百尺最高處

有王磐題壁立萬仞四字亦奇觀也



凌家山在府東三里有石洞傳是陳羅二仙隱處上有
凌雲塔又名凌雲山山南麓瀕姑溪去岸十餘丈爲釣
魚臺傳爲李之儀釣魚處

月盤山在府東四里一名景山有洞一亭六湖山烟雨
亭其最也登其巔溪山秀列如在几筵遊者謂不讓吳
下虎邱白門雨花云

白紵山在府東郡志云本名楚山晉桓溫遊此歌白紵
因改今名宋孝武曾遊幸至此山巔有大夫松舊稱白
紵松風爲一郡名勝

晉山在府東十五里一名甌山壁立百仞有龍窟歲旱
人焚此窟以起龍多得雨

石城山在府東二十里有石環繞如城唐羅泰記云有
八角井飲馬池駕鼓臺在焉舊傳楚熊繹受封於此

白土山在府東二十五里土可陶可埴東與青山連

靈墟山在府東三十五里舊傳丁令威化鶴於此壇址
猶存有丹洞丹井

龍泉山在府東三十五里勢如飛龍有福源寺在其脊
有泉傳羅浮異僧卓錫所開汲以竹則清以綆則苴濁
不可食傳寺初建材木自井中出

赭山在蕪湖縣西北五里江南地理志云赭山丹赤故
郡名丹陽山有塤塤後滴翠軒是黃庭堅讀書處

范蘿山在蕪湖縣西北五里下臨大江烟波一望無際

七磯山在蕪湖縣西北十五里南史云周文育襲彭城徐嗣徽引齊人渡江據蕪湖列艦於青墩至七磯以斷文育歸路卽此一名磧磯

靈山一名戰馬山在蕪湖縣西南五里大江中隋唐建靈山寺於此

礫磯山在蕪湖縣西南七里大江中蟻老蛟也磯有石穴廣一丈深不可測圖經云寧淵廟舊在其上明建靈澤夫人祠世傳蜀先王妃卽孫權妹歸吳聞先王崩哀殞葬此磯在北岸原隸濡須登磯止見蕪湖故明高啓有蟻磯烟鎖在蕪湖之句

白馬山在蕪湖縣西南二十五里有紫燕洞冬時紫燕來螫春則去山脊峰迴石聳有洞深廣莫測風多仙跡世稱爲福地洞天焉

荆山在蕪湖縣東十六里荆沼之水出焉西接小荆山有鶴跡龜文之石九域志謂卽卞和得玉處非是

赤鑄山在蕪湖縣東北八里圖經云楚干將造劍之所今山有干將臺相連有神山是其淬劍處上有磨劍石并池

浮邱山一名隱玉山在繁昌縣東十里府志云有浮邱洞及龍池鎖虎石丹井相傳浮邱公王郭二仙隱此產茶甚佳

隱靜山在繁昌縣東南三十里五峰環會泉石甚勝有

寺前雙松傳爲杯渡禪師手植

金峨山在繁昌縣南一里迤南有金峨洞一竅通人行石枰在焉山下卽峨溪匹練處

磕山在繁昌縣南十里上有龍池長流不竭有龍堂禱雨輒應一名蜃居山

馬仁山在繁昌縣南三十里以上類人馬狀舊名馬人唐德宗時石馬鳴厭之易今名上有五峰王冲霄隱此獅子山在繁昌縣南三十里石雄踞如獅因名有峰六眠牛一峰尤奇山椒石壁數十仞松杉竹樹與碧澗紅泉相間吞吐雲霧亦奇觀也

龍華山在繁昌縣十五里有乳泉通石竇資民灌溉石

上產丹桂一株近千年香襲里許邑稱龍華丹桂相近爲紅花山一名荷花尖諸峰如蓮萼下有紅花澗爲邑人造紙處又西五里爲杏山

覆釜山在繁昌縣西北二十五里山頂如平掌上有古廟址及井泉

公孫山在繁昌縣西北四十里世傳公孫捷所居有公孫橋

鳳凰山在繁昌縣西北五十里山頂有鳳池鳳穴下臨荻港珠金沙

大陽山在鳳凰山之北接小陽山有龍池雖旱不竭山之西麓盡於江曰板子磯寰宇記云一名返秦磯

三山在繁昌縣東北三十五里三峰秀起曰老子曰方丈曰秦望上有九蓮洞東卽三山磯也

赭圻嶺在繁昌縣西三十里與覆釜脈接晉時出紫玉攻爲器以獻太廟故名赭圻晉哀帝召桓溫入朝至赭圻詔止之遂築城於此

浮鳩磯在繁昌縣東北三十里老山址出江中下有湫江月映水波不能混俗名龍王磯

夏舍人山在郡治東北有夏舍人廟

大江在府西白銅陵縣界流入歷繁昌蕪湖當塗三縣東北流入江寧縣界

中江在蕪湖縣西南漢書地理志云中江出縣西南東至陽羨入海今縣河東達黃池入丹陽石臼等湖至銀林堰乃中江故道也蘇常承中江下流五堰築而中江不復東皆由縣西行以達於江

鵲江在繁昌縣北境流入蕪湖界輿地志云銅陵鵲頭山爲鵲頭至三山爲鵲尾因名鵲江繁昌諸水注之大信河在府西三十五里亦曰南浦自蕪湖白岸湖西北流至大信鎮會龍山港入於江

黃池河在府南七十里河中流以北屬當塗以南屬宣城今設浮航

采石新河在府西北二十五里牛渚磯東宋慶曆中以磯立江流之衝水勢湍激大爲舟害乃開新河於磯後

以達大江舟獲安濟

長河在蕪湖縣南半里源出廣德宣州經縣前西北流入江

青墩河在蕪湖縣南有洲曰青墩沙即周文育克徐嗣徽處

丹陽湖在府東南七十九里周三百餘里按徽州寧國

池州江寧廣德諸水匯為石曰固城丹陽三湖而丹陽

為最大與溧水高淳皆以中流分界實太平巨浸也

蕪湖在蕪湖縣西南源出丹陽湖過黃池合五丈湖路

西湖諸水至縣入江蓄水不深而生蕪藻故名

天成湖一名天聖湖在蕪湖縣東南十四里亦丹陽湖

下流所匯也廣百八十頃流入荆沼港達於長河

姑孰溪在府南二里一名姑浦合丹陽東來諸水經寶

積山入於江

思賢港在府北三十五里謝眺李白崔宗之皆過此賦

詩後人思之因名

魯港在蕪湖縣南十五里源出宣城西注大江一名魯

明江舊志云昔有魯明仲者居此

鳩茲港在蕪湖縣東四十里入於長河或以為古鳩茲

也左傳云楚伐吳至鳩茲杜預以為臯夷今作勾慈音

近而字譌也

荻港在繁昌縣西南四十里水出南陵由馬仁山西入

繁昌縣界至鳳凰山下為荻港入於江與赭圻城接
慈湖水在府北六十里元和郡國志云吳將笮融屯兵
於此

鼉浦在府東五里相傳昔有鼉為祟遇道者截草擲浦
中害遂除

廬州府

大蜀山在府西二十里爾雅云蜀者獨也山屹然孤特
遠見二百餘里為一郡之鎮其西二十里有小蜀山
大瀟山在府西百里有泉不涸其西為龍鳳山口東
南通舒城北走壽州

雞鳴山在府西北四十里舊志云肥水所經上有龍井

紫蓬山在府西南七十里有李陵廟又名李陵山肥水
出焉有逕達府西五十里之石佛山兩旁皆石中路通
人行元末設竹林關以守隘其近者為馬鞍山又西三
十里有蓮花山皆以形名

姥山在府東南百里巢湖中宋書云晉安王子勛兵攻
廬江沈攸之等大破之追至姥山又孤山亦在巢湖中
魏邢巒破梁將桓和於此一名聖女山上有大姥廟

龍泉山在府東五十里絕頂有泉迴繞僧寺
青陽山在府東六十里府志云元余闕讀書其上其南
為方山

四頂山在府東七十里俯瞰巢湖上有四峰特起相傳

魏伯陽鍊丹之所隋地理志云襄安縣四鼎山即此相近為梅子山

小峴山在府東七十里南史云齊蕭懿屯小峴禦王肅

梁韋叡侵魏拔小峴俱此又山側通全椒者為餘峴口

浮槎山在府東八十里一名浮巢山一名浮閣山方輿

勝覽云俗傳自海上浮來山頂有甘泉舊建道林寺相

傳梁武帝女為尼於此有海榴一株所手植也歐陽修

云山在慎縣南二十五里隋書地理志云有浮閣山在

慎縣王禕云慎縣在廬州界中附宋歐陽修浮槎山水

記浮槎山在慎縣南二十五里或曰浮閣或曰浮槎二

山其事出於浮圖老子之徒荒怪誕幻之說其上有泉自前世論水者皆弗道余嘗讀茶經愛陸羽善言水後得張又新水記載劉伯芻李季卿所列水次第以為

得之羽然以茶經攷之皆不合又新妄狂險譎之士其言難信頗疑非羽之說及得浮槎山水然後益以羽為知水者浮槎與龍池山皆在廬州界中較其水味不及浮槎遠甚而又新所記以龍池為第一浮槎之水棄而不錄以此知其說多失羽則不然其論曰山水上江次之井為下山水乳泉石池漫流者上其言雖簡而於論水盡矣浮槎之水發自李侯嘉祐二年李侯以鎮東軍留後出守廬州因遊金陵登蔣山飲其水既又登浮槎至其山上有石池涓涓可愛蓋羽所謂浮泉漫流者也飲之而甘乃攷圖記問於故老得其事跡因以其水遺於京師余報之曰李侯可謂賢矣夫窮天下之物無不得其欲者富貴之樂也至於蔭長松藉豐草聽山溜之潺湲飲泉石之滴瀝此山林者之樂也而山林之士視天下之樂不一動其心或有欲於心顧力不可得而止者乃能退而獲樂於斯彼富貴之能致物矣而其不可兼者惟山林之樂爾為富貴者而不得兼然後貧賤之士有以自足而高世其不能兩得亦其理與勢之然歟今李侯生長富貴厭於耳目又知山林之為樂至於攀援上下幽隱窮絕人所不及者皆能得之其兼取於物者可謂多矣李侯折節好學喜交賢士敏於為政所至有能名凡物不能自見而待人以彰者有矣其物未必可貴而因人以重者亦有矣故余為志其事俾世知

斯泉發自李侯始也

黃山在府東百二十里接巢縣含山界其峰三百有六十有泉不涸故亦呼龍泉山亦曰金庭山又曰紫微山道書所謂第十八福地者也山有金庭洞可容三百人又有紫微洞出泉居民引以溉田唐時又改名王喬山相傳王喬居此

冶父山在廬江縣東北二十里唐更名曰冶山宋碑曰鐵冶蓋冶鑄之所林巒峭密盤亘數十里自麓五里而至於巔上有龍湫亦曰鑄劍池濡須志云歐冶鑄劍處山比衆山特尊故稱父有子山三百六十四羅列其下蓋縣境之名山魏地理志云廬江郡潛縣有野父山即

此

蜃山在廬江縣東北三十里下瞰白湖縣志云昔曾有蜃出焉吐氣成樓臺殿閣之形

毛公山在廬江縣東七十里縣志云毛義隱此有毛公讀書洞石甃石窻猶存洞旁產白牡丹每歲所生不一其地相傳義父母甚愛此種義望天哀顛少頃遍山雪墜皆花後遂種延不絕蓋天生異卉也又北半里為蓮花洞中有石蓮下垂巧伴追琢山之東屬無為州

馬頭山在廬江縣東北七十里按晉書云毛寶援桓宣於此上有桃花仙人二洞其山口曰石龍山西有渡曰馬頭渡

金牛山在廬江縣西北四十五里嶺有塔縣志云吳赤鳥二年造下有金牛

關山在廬江縣西二十五里曹魏守隘之所石門尚存龍池山在廬江縣西三十五里舊志作栴山上有龍池下有甘泉寺按唐書云廬江縣有櫛山櫛栴相近或卽此也縣北三十里亦有龍池一洞深不可測

馬槽山在廬江縣西四十里有大小二槽形勢連屬各山半有石槽大者長二丈小者長丈五六尺形成自天不假椎鑿槽旁有人馬足跡世傳魏武嘗立寨其上大凹山在廬江縣西四十里以形凹得名上有龍王祠下有仙女石山勢參差難狀其第三峰有風洞巖深不可測投以草莖卽隨氣飛起

百藥山在廬江縣南十里山多藥草相傳李百藥遊此故名宋碑作白若蓋音之訛也頂上棋盤石有仙人足跡蹋之聲如鼓聞數里又名石鼓隋地理志云開化縣有蹋鼓山卽此乃邑鎮山也

福泉山在廬江縣南十里山下有泉清澈飲之可以愈疾南十里有菖蒲山產九節菖蒲

秀山在廬江縣南六十里山上有香爐峰世傳有仙飛昇於此黃泥瓦洋二河於此發源縣志云石上鐫刻有秀拔東南水外屏障十數字

鳳臺山在廬江縣東南十里五峰排列中高如臺昔傳

鳳集其上故名

礬山在廬江縣東南四十五里產礬宋時割置無為州今山在南鄉下有礬蓬硃砂澗

鐘鼎山在廬江縣東南五十里一名鐘子山盤礴甚遠上有龍池縣志云山東西有泉四時不竭灌溉田畝兩泉歲迭為盈縮妙不可測

暖塘山在廬江縣東十里下有溫泉四時可浴山多奇石嶺有二石屏玲瓏可愛

鹿起山在舒城縣東南三十里昔有僧過鹿出之事因名上有南嶽行祠祠前有試心臺洗劍池縣之鎮山也春秋山在舒城縣南二十五里其上為李公麟讀書堂

有洗墨池又有望湖尖鳳凰臺仙人峰諸勝絕頂有洞可容數千人

磨劍山在舒城縣西南三十五里上有大石為仙人磨劍處

七門山在舒城縣西南三十五里山瀕大溪下有石洞如門者七即七門堰之上源也

雲霧山在舒城縣西南四十里其山出雲必雨上有洞名水簾

龍眠山在舒城縣西南八十里括地志云龍舒以狀若龍之舒展也山之陰為龍眠砦與桐城界

三角山在舒城縣西南百二十里峰有三角故名又名

多智山相傳上有清泉飲之令人聰慧其近者為陽山土人曾避兵於此

梅山在舒城縣西七十里縣志云舊傳梅福棄官隱此上有梅仙洞又十里曰竹山

王姥山在舒城縣西九十里縣志云相傳王姥修煉居此有白鹿啣花之異其近者為栲栳山

響山在舒城縣東二十五里人過其下輒有聲紫芝山在無為州城內西南隅州志云宋皇祐間產紫芝三百五十本州守茹孝標獻於朝賜今名

眉山在無為州西南百里兩山連曲如眉三公山在無為州西南百二十里見隋志上有三峰因

名峰頭皆東顧唐天寶中改名東顧山山勢連亘數百里西界廬江南跨桐城上有洞若明季流寇縱橫江北居民倚以避亂相近有九卿山山有九峰

桐山在無為州西九十里有水道通白湖漁人用箔取魚故又名上箔蓋即隋志云廬江縣上薄山也又有下箔山

天井山在無為州西九里有泉二左曰青龍右曰白虎故亦名雙泉山其下有楚雲洞

朝喜山在無為州西北四十里旱時朝有雲氣是日必雨故名

白石山在無為州西北四十里山多白石頂有龍池仙

人洞隋地理志云襄安縣有白石山卽此州故襄安縣地其右爲黑石嶺爲桃花嶺爲楚歌嶺

呂泉山在無爲州西北五十里州志云又名龍泉山其形似龍上有水泉世傳呂洞賓過此插劍而泉湧纍纍如貫珠故名其近者爲銀餅山一峰特起如銀餅州之主山也

青檀山在無爲州北五十里產青檀北魏拔僕蘭設伏檀山破宋將魯爽卽此水經注云檀山在廬江雩婁縣南大別之異名也決水出焉或曰卽禹貢之大別山殊誤

五畝尖山在無爲州北五十里州志云頂平五畝許可

種植面臨巢湖羣山背峙登巖望之萬頃皆碧回顧則崇峰疊嶂隱見爭奇乃州中極高處也

卧牛山在巢縣治後以形似名爲邑之鎮世傳巢許隱此其故址今紫微觀是也輿地志云山背有桀王城東山在巢縣東三里相傳卽許由之箕山

七寶山在巢縣東南三十里三國時濡須山爲東關此山爲西關上有烟霞亭今廢其南有龜山

大秀山在巢縣南三十里山峰聳秀訾家河出焉宋楊傑詩所云水入平湖千里遠山橫大秀一峰高是也其側有黃谷嶺邑人薪樵於此蔣家河出焉

脚躡山在巢縣南三十七里左傳楚子觀兵於坻箕之

山又陳荀朗破郭元建於踟躕山蓋坻箕踟躕音相近今散兵灣卽其處也又縣南六十里有高林山七十里
有九峰山

居巢山在巢縣西南八十里谿谷間有石研之如墨舊名墨山唐改今名

萬家山在巢縣西北二十里爲四會之衝上有止渴泉舊時亂石壘錯明景泰中邑令閻徽修治始有路可行八公山在巢縣西北七十里一名紫金山水經注云上
有淮南王劉安廟綱目集覽云王與八公憇石處在壽春此則王遇八公處也

半湯山在巢縣東北十五里有二泉一冷一熱合流其初冷熱仍異數里之外始相混魚自冷泉觸熱急回羅隱詩云飲水魚心知冷熱濯纓人足識炎涼按隋志云

襄安縣有半陽山今或以湯池故譌爲半湯 附明聶芳

半湯池記 聞之西北之山有寒火焉東南之區有湯泉焉予奇之亦甚疑之後應試榕城友人爲言

五里外有池可浴拉予往爾時塵冗何暇探幽選勝一證胸中之所疑蓋予之耿耿猶未釋也辛丑治巢取邑乘閱之離城二十里許地名半湯有溫泉於是掩卷嘆曰予之疑其從茲釋乎及過其處諦視溫泉之源沸沸從下全湧若烹茗之松濤蟹眼狀從此掬水入池池不甚廣周圍結砌池之上覆以數椽又從內引出分二小池內清而外稍濁每歲夏秋之間車騎絡繹解衣盤薄致足樂也至若樵者牧者耕而饁者負擔者靡不就而盪滌稱快事焉吾夫子曰清斯濯纓濁斯濯足如斯之內外迥分貴賤俱適有道君子流連其間當必有喟然而嘉嘆者矣獨是既有勝地而敗壁頽垣荒榛密莽非唯不足以游目騁懷竊恐歛傾之餘終成瓦礫不大爲缺陷事耶予捐貲庀材構一庭以覆內池中堂軒敞可供宴飲又爲廊廡以蔭外池行路往來聊用駐足予差



慰矣豈徒以釋前此之疑哉夫湯泉亦既驗之矣寒火
猶未之見則猶不能無疑也雖然無疑也海鹹而魚沫
鐵堅而虫嚙天地間理之所無間為事之所
有事之所有終不為理之所無類如斯也夫

亞父山在巢縣東北二十里范增所居隋志云襄安縣
有亞父山形似旗故亦名旗山

白茅嶺在廬江縣西四十里即唐志所謂白茅山也路
達舒城

天台嶺在舒城縣西南百里最幽勝土人擬於天台故
名

芙蓉嶺在無為州北五十里亦名浮濃嶺山石險峻明
正統間知州王仕錫開鑿以便行旅接巢縣界

鶴石崖在舒城縣西南十五里兩石並峙俗名小赤壁


呂仙洞在無為州西北七十里有石床藥臼世傳呂仙
於此搗藥

王簿原在舒城縣西南百六十里縣志云崇山環之其
中平行相傳唐畢誠讀書於此

馬蹄岡在舒城縣西南石上有馬跡世傳天馬過此

大江在無為州南自桐城縣抵無為州界東北入於合
山凡無為州之水皆納於江其他諸縣之水多由巢湖
以達於江

金斗河源出雞鳴山東流入於郡城復自東門出至金
斗驛又府南三十五里有派河東四十里有店埠河與
此并入巢胡



茅埠河在府北百一十里東流由含山河入江

三河在府南九十里合盧江舒城二河水而入巢湖亦

曰三汊河

新河在盧江縣東半里流入東水關遶學宮出南關會

繡溪水而注於湖相傳楊吳時鑿

沙溪河在盧江縣東南十五里出大凹山東北流入沙

湖

石槽河在盧江縣東南四十里出礬山與瓦洋黃泥二

河俱入於黃陂湖

羅昌河在盧江縣南五十里源出大凹諸山南流從袁

子港入江又縣西南四十五里有高子河上接曹王河

下至孔城白兔諸河入於江

會市河在盧江縣北四十里源出馬槽山又縣北二十

五里有桐關河東北三十里有清野河七十里有谷勝

河與此俱入巢湖

順江河在盧江縣東北三十五里棲鳳諸山之水合流

於此與縣東北五十里之盛家河七十里之關河俱入

白湖

七里河在舒城縣西七里為西山眾流之會經南溪入

巢湖

永安河在無為州西四十里又州西十里為裏河與此

俱入於江

黃落河在無爲州北四十里源自焦湖流入於江

裕溪河在無爲州東北百二十里又州東北百里有樸樹河東北四十里有運河合於馬腸河俱入大江

花林河在無爲州城東源自大江上接三溪河下接黃

金岡大河復經裕溪河出江

輿龍河在無爲州東百二十里東接大江下通樸樹河復出於江又州東三十里有一箭河五十里有柵港河

三溪河在無爲州東南二十里與直皂河俱入大江

高林河在巢縣南六十里以山得名

柘臯河在巢縣西二十里源出合肥浮槎山入於巢湖宋史云劉錡敗兀朮於此又縣西五十里有銅場河六

十里有白露河七十里有巧溪河花塘河八十里有金

塘河

清溪河在巢縣東南十五里發源於含山之清溪鎮流入濡須水

巢湖在府東五十里一名焦湖周四百餘里占合肥舒

城廬江巢四邑之境港汊大小三百六十爲淮西巨浸舊傳巢陷爲湖滄桑之變世嘗有之但郡國志與青瑣

高議所載巫與老姥龜目出血城當陷云云一事兩傳且與歷陽湖同語頗涉誕恐未可據也

沙湖在廬江縣東南十里合於黃陂湖及諸山之水東出缺口

白湖在廬江縣東北三十里周七十餘里跨六鄉之地與黃陂後湖相連為邑巨浸

黃陂湖在廬江縣東十五里湖水常渾賓興之歲每一澄清邑必奪解合白湖諸水自泥汊入江

繡溪在廬江縣西五十里出馬槽山經縣南昇仙橋匯為黃陂湖

桃溪在舒城縣東北三十里一名桃城水源出六安淠河入於巢湖

南溪在舒城縣南門外水源出孤井經七門環縣治而東入於巢湖

錦繡溪在無為州西南十里宋時分而為二故名雙溪

亦名錦繡池

肥水在府城西南源出紫蓬山北流二十里分為二其一

一東南流經合肥縣入巢湖梁韋叡堰水以灌合肥在此其一西北流入壽春出淮晉謝元破苻堅處也爾雅

云水歸異出同曰肥南畿志云肥水東北經雞鳴山入金斗河一支西北流復東轉南下至東門外余公廟前

二水相合故曰合肥今上源已堙塞縣治之得名蓋以此

濡須水在巢縣南一名天河俗呼馬尾溝源出巢湖東流經亞父山又東北注裕溪入於大江

龍潭在府東北每山水乍溢羣魚猝至漁者所獲必倍

焉又舒城縣西亦有龍潭邑令劉顯作壩以灌諸堰處
鵲尾渚在舒城縣東北舊有鵲亭左傳楚人伐吳吳人
敗諸鵲岸杜預註云舒城鵲尾渚是也按鵲尾渚與銅
陵縣鵲頭山對面當在無爲州界無爲舊屬舒城故名
孤井源在舒城縣西百五十里志云俗稱孤靜源其水
經七門三堰旋遶通於南溪入巢湖

鐵索澗在府西北八十里澗東窮處一潭甚深渟泓洄
演四時不竭晉謝元破苻堅處也舊傳嘗有鐵索見於
水際

笑泉廬江縣有二一在魯班塘內聞人笑聲水輒湧沸
高尺許一在發洪山兒童笑則泉亦湧也故名笑兒泉

左慈泉在昇仙橋外世傳魏左慈常遺丹粒其中宋政
和間清夜氣肅紅光燭天鄉人呼曰丹井舊志作左慈
井

鳳陽府

鳳凰山在府北勢如鳳翔郡治據焉故以名郡連萬歲
山明築皇城於此東有二峰對峙一名日精一名月華
又東三里有獨山舊建觀星臺處

曹山在府西三十里舊傳魏武曾駐兵於此
畫山在府西五十里山有木枝如楊柳可用畫故名
廟山在府南十五里其上有伍子胥廟又府西南四十
里有靈山六十里有尹家山

雲母山在府西南三十里產雲母石西南二十里有石
膏山產石膏

長安山在府南四十里東西平行東曰東堡卸甲店西
曰打虎店峰巒殊勝

杏山在府南六十里吳時董奉種杏於此後服杏丹仙
去

鑛鄒山在府南八十里相傳昔莫邪於此鑄劍故名
蔣山在府東二十里梁時鍾離之捷梁主夢金陵蔣山

之神許以助兵遂立祠祀於此而因以名山
梅城山在臨淮縣東四十里下有梅城邨又東十里曰

石門山山下有石如門

化明山在臨淮縣東六十里隋置化明縣因以名山

烏雲山在臨淮縣東南六十里亦名烏霧山以山多濛
霧也與定遠縣接境

鹿塘山在臨淮縣南二十八里山下有白鹿塘又縣南
三十五里有留甫山其下有留甫邨五十里有小橫山

濠塘山在臨淮縣南六十里濠水出焉山有石穴出鍾
乳又名鍾乳山

昇高山在臨淮縣西南五十里俗以九日登此山故名
東西二濠水合流於此

闌干山在臨淮縣西二十里山相連如闌干狀
礦山在臨淮縣東北六十五里山有石洞世傳仙流所

居

塗山在懷遠縣東南八里與荆山兩岸對峙而淮流經其中古塗山氏國於此春秋傳云禹會諸侯於塗山杜預謂在壽春東北者是也山下有禹墟及禹會邨又山半有聚仙臺臥仙石又有靈泉澄瑩不竭其南麓曰九岡岡形夾澗起伏有九俗名九岡十八窪適府之通衢

附唐柳宗元塗山銘并序

惟夏后氏建大功定大位立

懷之道儀型後王當乎洪荒方割災被下土自壺口而導百川大功建焉虞帝耄期順承天曆自河南而受四海大位定焉萬國既同宣省風教自塗山而會諸侯大政立焉功莫崇乎禦大災乃賜元圭以承帝命位莫尊乎執大象乃輯五瑞以建皇極政莫先乎齊大統乃朝玉帛以混經制是所以承唐虞之後垂子孫之不業立商周之前樹帝王之洪範者也嗚呼天地之道尚德而右功帝王之政崇德而賞功故堯舜至德而位不及嗣

湯武大功而祚延於世有夏德配於二聖而唐虞讓功焉功冠於三代而商周讓德焉宜乎立極垂統貽於後裔當位作聖著為世準則塗山者功之所由定德之所由濟政之所由立有天下者宜取於此追維大號既發華蓋旣狩方嶽列位奔走來同山川守神莫敢違寧羽毛四合衣裳咸會虔恭就列俯僂聽命然後示之以禮樂和氣周洽申之以德刑天威震耀制立謨訓宜在長久厥後啟征有扈而夏德始衰羿拒太康而帝業不守皇祖之訓不由人亡政墜卒就陵替向使繼代守成之君又能紹其功德修其政統卑宮室惡衣服拜昌言平均賦一制度定期會則諸侯常至而天命不去矣茲山之會安得獨光於前歟是以周穆遐追遺法復會於是聲垂天下亦照前軌用此道也故余為之銘庶後代朝諸侯制天下者仰則於此其辭曰惟禹體道功厚德茂會諸侯衛統一憲度省方宣教化制殊類咸會壇位承奉儀矩禮具樂備德容既孚乃舉明刑以弼聖謨則戮防風遺骨專車克威克明疇敢以渝宣昭黎獻底定寰區傳祚後昆丕承帝圖塗山巖巖界彼東國惟禹之德配天無極即山刊碑貽後作則

洛河山在懷遠縣南六十里以近洛而名其西峰曰洪

山東峰曰神山出煤炭

平阿山在懷遠縣南六十里與壽州接境漢置平阿縣以此俗誤為平峩

荆山在懷遠縣西南舊志云山西北有玉坑相傳卞和得玉處其中白石晶瑩不受鑿刻東有卞和洞一名抱璞巖可容數十人上有瀑布又有三仙避雨石仙人睡

迹白龜泉北有濯玉澗南麓有梅澗蕭梁時於山下立堰以遏淮流曰荆山堰山之餘支為龜山為橫山附明

宋濂遊塗荆二山記濂既遊琅琊山起行至池河驛適郵卒遞內使監公牒至及開緘中

藏濂梁古蹟一卷宸翰親題其外令濂搜訪與青宮言之濂因啟曰臨濂古蹟惟塗荆二山最著按圖經塗山在昔鍾離縣西九十五里荆山亦在縣西八十三里二山本相聯屬而淮水繞荆山之背神禹鑿開使水流二

山間其疏鑿之跡故在人思其功迄今弗能忘青宮曰至中都當共往遊焉余將渡淮狩於王莊先生宜沂流而上屆今懷遠縣治以俟濂奉勅行以洪武乙卯冬十一月己巳發舟庚午日曉始泊縣西門而青宮已駐蹕於東門五里矣辛未濂上謁青宮喜甚下令以壬申遊二山濂至期約懷遠文學掾王景彰宿舟中黎明擢舟至塗山足曳杖入山山旁廢址舊昔民廬前渡石梁復斗折而北累石為塘多藝椒之園行可三里餘視大磐石青綠間錯頽然歛足坐諦視之乾蘇交封之耳聞有草生石上高一尺其花可愛不假土力人取懸檐間呼為石蓮花復行四里所巖石犖確插起道左危傾欲飛墜復二里所從微徑入灌莽抵崖罅貯泉一泓味甚甘覆以生茨曰聖水亭取水以禱雨多驗復一里餘至山巔禹廟在焉廟已毀惟頽垣破礎存遊目四顧長淮西來渦河北匯而壽春臨濂宿州之境皆在冥茫昏杳中緬想南北戰爭屯戍處為感慨者久之山之下聚落甚盛廟史云名禹會邨乃禹會諸侯之地廬舍之比如櫛移踵入廟廟前杏樹一章大可蔽半二柏參差左右樹東寘小甕杏柯之水時津津滴其中廟史云當辰霧四集水愈多其來如泉可代井汲石碣二一大書有夏皇祖之廟六字下方刻宋慶元初州守劉仲光自造禱雨記一亦記禱雨事皇甫弼紹興庚戌來為郡命鍾離尉



丁大榮作石未剝泐文尚可讀復從廟西循石坡而下
鉅石危立如人形遙望之一嫗儼然也相傳為啟母石
廟史云居人每刲羊豕祭之至有以粉黛飾其貌者聞
之不覺大笑山坳舊有僧房今廢久俟鶴駕不來忽使
者至云扈從士馬多無橋可以渡河青宮不復至矣言
未既但見旌旗如錦繡搖曳上荆山矣濂亦下山麓入
繇廟見所題神號鄙俚棄而不暇出讀祖無擇所賦歌
京口孫臨為書碑蓋無擇謫守壽春過此而作也復北
經縣治折而東行三里所至荆山梁魏交鬪時就山築
堰以灌壽春其遺蹟猶班班可見復行三十步崖廣如
屋側身而入石屏如床座可坐人號為卞和洞自西上
復一里所過避雨石石斜倚可避雨故名復六十步至
產玉坡奇石駢列西有玉池榛荆迷路不可尋時青宮
已獵遠郊濂因登舟先還中都云惟二山見諸戴記者
多殊以塗山言之春秋左氏傳云禹會諸侯於塗山杜
預注云在壽春縣東北說者云今濠州是也國語史記
則又云禹會諸侯於會稽故會稽亦有塗山吳越春秋
亦以塗山在會稽應劭云塗山在永興北說者云今會
稽蕭山縣是也是二說已不能歸於一致矣至於蘇鶚
演義又云塗山有四一會稽二渝州三濠州四當塗然
其處皆有禹跡或者遂謂禹之治水固嘗徧歷宇內而
會諸侯實在會稽之塗山柳子厚塗山銘蘇子瞻子由

塗山詩指在濠州者皆非是濂之存疑而未決者一也
以荆山言之荆山楚山也楚之先王熊繹僻在荆山七
傳至昭王始遷都郢鄢即今之江陵其地有荆山一名
景山荆故楚號也有之誠宜世則指為濠州濠州古鍾
離子國與壽春密邇楚自昭王之後歷十一傳始徙都
壽春韓非子所載卞和獻玉事乃在厲武文三王之際
昭王上接武王已越十世當三王特鍾離何嘗屬楚而
強謂卞和至此山耶新序又謂抱玉而泣在共王之時
雜記又謂在懷王及其子平王之時平王乃昭王之父
下拒懷王九世共王上至武王亦六世何顛倒如是耶
濂之存疑而未決者二也大抵山川遺跡非本諸經史
者多不可信必欲可信塗山當稽之左氏以壽春為正
荆山當正諸史傳以江陵為正有謂塗山氏乃古國名
禹曾娶其女者別是一說與此殊不相涉也濂耄矣諸
書遺忘欲盡所記憶者未必無
舛訛輒緣紀遊因掛漏書之

相公山在定遠縣東六十里有楚相令狐子伯廟因名
稍西有豁鼻山東樂山

大橫山在定遠縣東七十里其山橫界邑之東南故

江南通志 卷之七
山頂有石壘舊址西南有石佛高丈餘相近有皇甫山
相傳昔有皇甫將軍屯兵於此

華蓋山在定遠縣東南二十五里頂圓覆如蓋又縣東
南六十五里有喜龍山朗峰山

槎枒山在定遠縣西七十里山形槎枒古有槎枒寺明
洪武間改建圓通禪寺中有芝巖洞

三峰山在定遠縣西北三十里山有三峰秀麗特異有
禪窟洞石窟泉多修篁古木

韭山在定遠縣西北四十五里地煖多韭故名山上石
城兵火時常保聚焉山下有洞其中澗水常流石形如
器物者甚衆左右多唐人題刻後爲峻巖遊者莫能至

相近有青山有銅骨山青翠相接

橫澗山在定遠縣西北七十四里上有石壘及澗泉

白石山在定遠縣北三十五里多白石相近有大紅山
多紅石

秦橋山在虹縣東北二十里有秦氏所造橋下有泉兩
派分流左清右濁

朱山在虹縣東北三十五里上有靈祐祠祀梁之朱買
臣俗誤以爲漢之買臣上有聖水泉甘而冽南有峰山
界泗州

赤山在虹縣東北七十里四面皆水

石龍山在虹縣北二十里上有石蟠伏如龍鱗甲儼然

屏山在虹縣北二十里列翠環抱若屏一作平以山勢
平衍而名下有平山湖

鹿鳴山在虹縣西三十五里相傳明成祖嘗駐蹕其上
夜聞鹿鳴因名

紫金山在壽州東北十里五代史云周顯德四年征淮
南南唐援兵營於紫金山與壽州城中烽火相應宋太
祖率殿前諸軍擊紫金山連珠砦拔之遂下壽州卽此
上有淮南王宴客處間拾小金牌可療疾疑丹砂所化
也

黃閣山在壽州東北五十里州志云世傳楚春申君黃
歇嘗遊於此寰宇記云州東北八十里有舜哥山相傳
舜耕此上有大人足跡

峽石山在壽州西北二十五里夾淮爲險郡志云在下
蔡西南寰宇記云兩峰相對水經其中對岸山上築二
城以防津要魏諸葛誕舉兵王永據峽石以逼誕晉胡
彬據壽春城陷退保峽石卽此處也兩岸石上有大禹
疏鑿舊蹟山口有茅仙洞

八公山在鳳臺縣東北五里肥水之北淮水之南漢淮
南王安與其賓客八人學仙於此因名晉史云苻堅兵
敗望見八公山草木皆晉兵卽此一名肥陵山州西北
有青岡晉謝元乘勝追擊苻堅至青岡附梁吳均八公

山賦峻極之山蓄聖表仙南參差而望越北邇迤而懷
燕爾其盤桓基固合陽藏霧絕壁嶮巖層巒互

桂皎月而常圓雲望空而自布袖以華鬪帶以潛淮文
星亂石藻日流皆若夫神基巨鎮而卓犖荆河箕風畢
兩育嶺生峩高岑直兮蔽景修坂出兮架天以迎風而
就日若從漢而廻山露泣葉而原淨花照磯而岫鮮促
嶂萬尋平崖億絕上披紫而生烟傍帶花而來雪維英
王兮好僊會八公兮小山駕飛龍兮翩翩高馳翔兮翀
天

四頂山在鳳臺縣北七里東與八公山相對

打鼓山在宿州北三十里上有三峰東北有二泉可漑

田揭後斯望光樓記云山中有聲如鼓鳴歲則大熟

離山在宿州北五十里產符離草爾雅所謂莞也秦以

此名縣史記陳涉傳初起兵有葛嬰朱雞石符離人

騫山在宿州北七十里以山有閔子騫墓而名墓左右

龍澗潭

睢陽山在宿州西北三十里山在睢水之陽故名舊作

諸陽

芳巖山在宿州西北六十里旁有石巖四時芳馥相近

爲邱疇山

相山在宿州西北九十里相城鄉周二十里甚危峻舊

有相山碑記云巍巍相山盤紆穹崇上應房心與天靈

冲其西南爲天馬山西控汴河

嵇山在宿州西南百有十里嵇康家於其下因氏焉

龍車山在靈璧縣北二里縣之主山也山之陽有石泉

又北三里爲栲栳山廻環如椅故名

磬石山在靈璧縣北七十里山出磬石故名禹貢云泗

濱浮磬卽此揮塵錄云宋政和間起艮岳靈壁貢一巨石高二十餘尺周圍稱是舟載至京師千夫舁之不動裕陵以爲神物表異之親書慶雲萬態奇峰六字加金帶其上頃刻移至苑中

附

明王守謙靈壁石考

石之堪作玩者

吾靈壁石稱最謂其峰巒洞穴渾然天成骨古色黝扣之有聲按譜有形如蟠螭如菡萏如臥牛者又有臥沙不起峰者甚有盡天劃神鏤之巧者總之萬石萬局於深山中掘之乃得不知的係何時發坑第考之載籍宋以前未聞有靈壁石按橋李頊氏有靈壁石一座長二尺許色青潤聲亦汎然皆有黃沙文一帶峰巒皆雋下金填刻字云宣和元年三月朔日御製御書其下押一字又大衍庫有靈壁小峰長僅五六寸玲瓏秀潤所謂胡桃玉色徽宗御書入小字刻於峰旁云山高月小水落石出畧無刻琢之形觀此則靈壁石始見於宋曾爲至尊之寶愛其品可知已自米顛酷嗜而聲價益重其爲揚次公攫去者乃所謂盡天劃神鏤之巧者也後得李後主所寶靈壁研山徑長纜踰尺前聳三十六峰高者爲華蓋峰其參差錯落者爲月岩爲玉筍爲方壇爲

上洞爲翠巒又有下洞三折而通上洞中有龍池遇天欲雨則津潤滴水少許在池內則經旬不燥米老甚珍之及其歸丹陽也愛甘露寺下並江一古基多羣木唐晉人所居則薛氏之宅也時米欲得宅而薛覲得研於一入渠手不得再見每同交友往觀亦不出示紹彭公真忍人也蘇東坡畫醜石風竹易得張氏靈壁石一株具有四面如麋鹿宛頸狀後載歸陽羨趙松雪有靈壁石香山一座下刻雲根二字又一石其大如拳峰巒皆五列公名之五老峰手抓之拂之亦有聲此皆得之本子上者也余在南中曾見一靈壁石長僅數寸十二峰參差突起毫無雕琢又一石天生雙螭蟠結中有小水池如錢許大其黑如漆間有細白紋如玉扣之聲泠然此天下所無而靈壁獨有偶一有之而絕不復出良不可解然余猶及一見耳又見如臥牛者想亦宋元舊物流傳人間者矣國朝垂二百六十餘年寥寥無聞卽問之土著者亦竟不知靈壁石爲何物迨萬曆己酉南臺侍御眉山鴻阮張公訪此石甚殷乃好事於磬石山澗壑中乘雨後覓之稍稍見一二於是習茲山者凡牧豎樵子莫不求石有力者遂發坑取之而石漸出矣歲庚申庠師吳興長組先生天中濬源先生親往采石而郡侯竟陵別鳳藻先生單騎往視之僉稱南宮之後再睹

此舉亦稍稍獲有佳者其人情好尚之極卽山靈亦終難祕其珍遂爲此石之復興與此後掘石者日益駁蘇人不愛善價買舟載去一入靈境莫不侈口譚石突然風尚良可駭異走南中販石者踵相接而格價頓減惟睹有峰巒與盡天劃神鏤之巧者則絕不可復得矣蓋研山蟠螭與盡天劃神鏤之巧者則絕不可復得矣蓋物之尤者多見於始出而其後漸銷落也端溪下岩發於宋而竭於宋安知今日之石不將爲廣陵散乎海內王元美之祇園董元宰之戲鴻堂朱蘭嵎之柳浪居米友石之勺園王百穀之南有堂曾蓮生之香醉居劉際明之悟石齋劉人龍之夢覺軒彭政之之嗇室清玩充斥而皆以靈璧石作供果得未曾有乎而諸公之韻固均足以敵之矣獨喜吾邑劉節齋先生其別業觀音閣前一石徑數尺嵌空玲瓏色極清潤先生鍾愛之令此石旦暮聞鐘磬聲且與蒼松碧梧相依傍則其神怡其神往片石堪共語其在斯乎或云此係張氏園亭物然竟非新坑石也

潼山在靈璧縣北七十里潼水出焉世傳莊子嘗修道於此有南華觀

陳疇山在靈璧縣北八十里陳疇堡亦名陳搏山相傳希夷常寓於此有希夷洞

張山在靈璧縣西北九十里其西五十里有貢山屬蕭縣相傳子張子貢遊學之地

齊眉山在靈璧縣西南三十里山開八字如列眉建文三年徐輝祖敗成祖於此

孟山在靈璧縣東北七十里相傳孟子嘗遊此山下有娑羅樹歲以枝葉先發所向之方爲豐兆

分水嶺在臨淮縣東九十里其水東入盱眙西入臨淮斷梅谷在懷遠縣荆塗二山間或曰二山本爲一脈禹

以桐柏之流泛濫爲害乃鑿山爲二以通之今兩山間

有斷梅谷濱淮爲勝云或曰周世宗以荆塗有王氣斷之時谷有梅氏聚族居焉因名

劍山在定遠縣西北相傳山有寶劍雨過或倚路傍

龍子河在府西三十里源發南山北匯爲湖經長淮關入淮

天河在懷遠縣南五里源出府治之利山西北流經塗山南入淮又縣西有洱河西南有茨河俱發源蒙城至縣入淮

淝河在懷遠縣北二十里出宿州之龍山湖流經蒙城縣界東南至縣之雙墩入於淮有魚鳧菱芡之利按此乃淮北之淝水也

清溝河在懷遠縣北二十里自宿之龍山湖東南流合十湖天堰諸水至縣北會淝河而水始大舊自靈璧南境至府治沫口河入淮今下流淤塞時有泛溢之患池河在定遠縣東南六十里自廬州巢縣界流入境內又東北經盱眙入於淮

潼河在虹縣西南二十里南潼河源出羊城湖經縣治西南入泗州北潼河出縣西北東流入睢水

沱河在虹縣西南源於宿州紫蘆湖經縣東九都爲南沱河西九都爲北沱河二水合流入五河縣

東肥河在壽州東北十里源出合肥之紫蓬山北流二十里分爲二其一東南入於巢湖見廬州府其一西北

流二百餘里至州境入於淮按此乃謝元破苻堅處淮南之肥水也又西肥河在壽州下蔡西南十里亦入於淮

大香河在壽州東南三里自芍陂大香門分流九曲至州三里橋北入於淮乃唐宋運河元始淤

解河在宿州東南又曰蟹河源出州西之仁義鄉東流經靈璧縣西南入淮

泡河在宿州南九十里源出亳州舒安湖經州之舊臨渙城合澮水

澮河在靈璧縣南七十里源出河南永城縣馬長河東流歷宿州至縣境東南入五河縣界

小河在靈璧縣北六十里卽睢水項羽追破漢軍多殺士卒睢水爲之不流是也

月朔湖在臨淮縣東一里北流入淮

萬安湖在虹縣西北卽潼陂也宋朱弁詩云離汶未逾千里道渡淮先泛萬安湖舊志云疑卽今之天井湖又縣西南四十里有老營湖

羊城湖在虹縣西北四十里古虹州城沒於此

四山湖在虹縣東北四山下又有峯山湖在峯山下與泗州接境

西湖在壽州西門外一名熨湖又名尉升湖水經注云羊頭溪水受芍陂西北流經熨湖是也

焦岡湖在壽州西三十里相近爲董奉湖

紫蘆湖在宿州西產蘆色紫

石湖在靈璧縣東北十五里中有巨石水消長不過舊痕人以爲異

淮水在府北十里自潁上縣抵壽州經懷遠之荆塗二山至府治北東過臨淮入於泗州

渦水在府西北自蒙城縣界流至懷遠東入於淮謂之渦口唐李吉甫云濠有渦口之險謂此漢建安中曹操引軍自渦入淮南北朝爲控扼地

濠水在府南十里有二源東出濠塘山西出鎖鄒山至昇高橋合流又東北入於淮其水經府治及臨淮縣境

臨淮西南有石絕水謂之濠梁卽莊惠觀魚處也

洛水在懷遠縣南七十里自定遠之清洛澗流經壽州至縣境入淮亦曰洛澗注淮處曰洛口

汴水在虹縣南自開封東來經宿州抵縣境東南至泗州入淮

淝水在壽州西七十里源出霍山東經霍邱縣至州境北流入淮方輿勝覽云淝有蛟害楚芊乙射之遂絕

睢水在宿州北二十里自河南夏邑縣白河經州之符離會泗入淮其上流之支爲瞿溝亦曰曲溝又州之蘄縣鄉有蘄水渙陽鄉有渙水卽濊水

浚水在靈璧縣東南入於淮

響水潭在虹縣西門外潼汴合流至橋下波濤相擊聲如雷吼

白馬潭在虹縣南二十里水中有石廟曰龍王廟有見白馬出沒其中者禱雨時應

龍浣潭在宿州閔子鄉武城里之左歲旱禱雨即應響水澗在臨淮縣城東又有蕉子澗紅娘子澗蓑澗沙澗青山澗俱入於淮


碧溪澗在懷遠縣南一里自荆山下曲流經城中入淮又有冷水澗茅澗柴澗俱入於淮
清洛澗在定遠縣西八十里晉謝元率諸軍涉洛澗敗秦兵於壽陽即此

粉團洲在府西北三十里睢水之南洲上多白沙故名明初於此築城設衛即今之長淮衛也

芍陂在壽州南安豐廢縣亦曰安豐塘又曰期思陂楚相孫叔敖決期思之水即此詳見水利

漢泉楚泉俱在定遠縣西五十里二泉俱紆迴自南而西合流入洛

咄泉在壽州北五里泉與地平每聞人聲水輒湧出如珠又名珍珠泉



西合流入海

斯泉發泉與奔或數里西五十里二泉身發自南而

淋發赫赫炎氣出之水噴地有泉木條

江南通志卷十七終

